

Reame

M'arricordu l'armunia
Di quella alba purpurina
È a stella matutina
Ch'inde u celu sbiadia.

M'arricordu l'aria pura
È l'ansciu di a natura
Quando u ghjornu nascia.

M'arricordu a carezza
Di l'ambata profumata
È u velu tinnarezza
Di a sciuma immaculata.
Sempre a mio nave mi pare
Azzicata da u mare
Chì m'annanna incù dolcezza.

*Eiu ch'aghju sulcatu
L'onde di tanti mari,
Per l'orizzonti chjari
Ch'avia sunniatu...*

*Eiu ch'aghju sfrisgiatu
L'onde di l'oceani
Per i vostri dumani
Ch'avia sunniatu...*

M'arricordu u cristallu
Di issu reame turchinu
È ogni fondu marinu
Intricciatu di curallu.
È tante sirene bionde
Principesse in le so onde
Chì m'invitonu à u ballu.

M'arricordu a magia

Di quella attrachjata bruna
Quandu u sole ridia
Ghjuchendusi cù a luna.

*Era l'ora più serena
Fascendu d'oru a rena
L'ultimu ragiu muria.*

*Eiu ch'aghju sulcatu
L'onde di tanti mari,
Per l'orizzonti chjari
Ch'avia sunniatu...*

Eiu ch'aghju sfrisgiatu
L'onde di l'oceani,
Per i vostri dumani
Ch'avia sunniatu...